

lunares fuerunt. Quocirca tetraeterides, quibus Olympiaca ludera continebantur, quoad fieri poterat, perinde Soli, ac Lunæ congruebant.

Ad hæc solaris circuitus naturalis & propria mensura est orbis anni, ut intervalli mensuri Luna. Quo fit, ut ad annorum fixa certaque spatia significanda tacitus illum mortalium consensus adhibeat. Neque propterea necesse est popularem ubique esse Solis annum. Quod in Judæis, Arabibus, reliquisque cernimus. quorum civilis annus lunaris est, Arabum imprimis. Et tamen quoties atatum, & hujus generis ceterarum rerum, quæ ratas, & constantes habent vicissitudines, intervalla concipiunt, naturalibus ac vertentibus annis utuntur. Vide quæ de Judæis ex R. Arama diximus lib. Ide Doct. Temp. cap. VIII, & lib. II, cap. XXXI.

Alphonf. pag. 25, num. 34

Atenim si naturalis annus est Solis; Lunæ verò dumtaxat artificialis; non est verisimile, Græcos naturali anno spreto, alterum genus usurpasse. Hoc enim Caranza nobis objicit. Verum quod ille de annis, hoc de mensibus vicissim retorquere possumus. Cum enim naturalis mensuri spatii dimensio ex Lunæ circuitu pendeat; Sol autem non nisi *regnum*, & ex hominum instituto, ad mensum discrimen assumatur; consentaneum est, Græcos ad Lunam potius, quam ad Solem menses exegisse civiles. mensum enim potissimum ratio in plebique civilibus contractibus habita est; ut in re fœnebriciquidem usurarum penitaciones erant mensuræ. In reliquis, quæ ad naturalem magis annum accommodantur, præstò illis erat, ut & nationibus omnibus, Solaris conversio, quam cum anno civili implicatam interim, ac tacitam tenebant.

Hæc satis sunt ad ea refellenda, quæ Sectione tota secunda Capitis tertii disputat Alphonfus, eadem sæpius, non sine lectorum tedio, repetens. Horum enim vis eo spectat omnis, ut rata quadam ac descripta temporum intervalla penes Græcos existisse doceat, quæ non nisi Solis annis orbibus metiri illi poterint. Quod nos etiam ultrò confitemur; & quemadmodum cum anno populari ad Lunam descripto consistere ista queant, hæcenus explicamus. In quo etiam, per summam ejus, quod scribebat, incertiam, & *de regibus*, suffragatorem habemus Alphonsum.

Qui inter alia civilis anni Solaris argumenta istud affert; quod intercalationibus, & subductionibus variis lunarium mensum cum Sole popularem suum annum conciliaverint Græci. Id enim arguit, civiles annos ad Lunam descriptos esse. Alioquin nihil opus erat intercalationibus. Tum ex eo consequens fit, Græcos non aliter solarem annum observasse, quam in tota Periodo annorum plurimum: non autem in annis singulis. qui utique lunares erant. Nam intercalationes lunarium mensum non in quolibet anno fieri poterant. Sed tertio, sexto, octavo, & ita reliquis in annis. Postremò ex lunariis mensibus tam ordinariis, quam intercalariis, anni lunares singuli non fiunt. sed de anno Græco, Atticòque nimis fortasse multa. quam ut disputationem longius opinione mea tenderem, fecit ejus, quo cum res erat mihi, Hispani Jurisconsulti indoles; qui ut citandis quam plurimis auctoribus multiplici sibi lectionis famam parare instituit. ita commovendis omnibus quæstionis partibus, non vulgarem in singulis *rebus*, ac peritiam ostentare voluit.



DIONYSII

DIONYSII PETAVII E SOCIETATE JESU, AD AUCTARIUM OPERIS DE DOCTRINA TEMPORUM VARIARUM DISSERTATIONUM LIBER QUINTUS.

In quo de anno Judaico, Ægyptiaco, & Romano vetere contra Alphonsum à Caranza Hispanum, & Claudium Salmasium disseritur.

CAPUTI

De civili Judæorum anno sententia nostra proponitur. quæ & ab Alphonfi calumnia vindicatur. Hujus opinio falsa de triplici anno civili. reliqua item absurdè scripta.

Dirige op. I.

Ab anno civili Judæorum initium disputandi fecit Alphonfus. Quo in capite primùm *avnyaxias* nos redarguit: tum quid ipse sentiat, quomodo potest exponit. Ego eundem ordinem secutus, primùm de me; tum adversus illius opinionem verba faciam. Ac principio quæ mea sit, & in libris de Doctrina Temporum fuerit ea de re sententia, breviter attingam. Quænam esset olim apud Hebræos veteres popularis anni ratio, non solum antequam Moyses illorum factos edideret: sed etiam sæculis deinceps aliquot; certo neminem affirmare posse dixi: neque me dixisse modò pœnitet. Nam quod ad Lunam exactos illorum menses, & annos, saltem post Mosem plerique sentiunt, id nullis satis firmis argumentis ostenditur. Quippe Lunaris mensis, Lunæve nulla in Mosaicis libris occurrit mentio. Quamquam aliquot ante Christum sæculis, posteaquam sub Græcorum dominatu cœperunt esse Judæi, verisimile esse docui, lunarem ipsos annum populariter habuisse. Quin & Moysis tempore, si non civilem iis fuisse, certè ad sacra, festivæque dies usurpationi videri; etsi nihil hæc de re ex Scripturis idoneè colligi possit. Hæc nostra de præfco Hebræorum anno vel opinio, vel dubitatio fuit, exposita secundo de Doctrina Temporum libro, capite XXVII, XXVIII, ac XXX, sanè constanter.

Cap. I.

Contra quam Alphonfus à Caranza primùm omnium de contrarietate præscribit. Nam nos asserit alibi lunarem annum civilem tribuisse Judæis, lib. I, cap. V, & VIII. idque postea mutasse. Sed profectò scribendi ac reprehendendi nimis ardor præcipitem egit hominem: neque quid argueret prorsus animadvertit. Nam cap. illo quinto verba nostra sunt. Nam & Ægyptii cum *avnyaxias* suo anno periodos lunares implicabant: & Judæi ipsi, quibus ad Lunam descriptus erat annus, propter *embolismos*, & *cardines*, sive *Tekuphas*, solaris anni modum aliquem stauerant. Hic ego non Judæos veteres assero ad Lunam descripsisse civiles annos; sed recentiores, qui post Seleucidarum exordium existiterunt. ut ex lib. II, cap. XXXI intelligi potest. Similiter octavo capite libri primi non de antiquissimis, ac Mosaicis temporibus locutus sum, sed iis dumtaxat, quæ Christum sæ-

culis aliquot antecesserunt; quod idem caput XXXI docet libri II, si cum octavo illo comparetur. Intererat ejus, qui aliorum errata castigare vellet, non tam graviter aditu in ipso reprehensionis offendere. Sed non hic finis hallucinandi. Nam ecce num. 5, ac sequentibus caput alterum nobis *avnyaxias* impingit. Etenim lib. IX, c. IX post nonnullam de veteris anni forma dubitationem, eò tandem delapsi sumus, ut æquabiles menses, ac tricenarios Patriarchis illis tribuerimus. quod ipsum erat, inquit, ab lunari typo desciscere. Quid hæc argumentatione firmius? Agitur de anno Judæorum veterum, cujus ratio ac forma quaritur. Ille ut inconstantia nos arguat, ea nobis objicit, quæ de anno Patriarcharum veterum, ac Diluvii tempore alibi scripsimus. Ergo Judæi, Noëmi ac Diluvii temporibus existerunt? Potes eodem jure, & Hispanorum annum veterem simili ratiocinatione colligere. potes & Italarum. Non enim minus Hispani, & Itali, quam Judæi sub Diluvii tempore existabant. Atqui toto illo reliquo capite, ac singulis penè verbis idem repetit: me ab Hebræorum, ac Judæorum usu prædilectum alioqui *mibi annum lunarem* abjudicasse, quod Diluvii temporis æquabilem anni formam potius adscribam. At ò bone! uter nostrum fautor est ardentior; ego lunaris anni, an tu Judaici nominis, atque gentis? Nam tu Noënum, ejusque filios Judæos omnes facis? in eoque non solum Apostolo contradicis, qui ad Romanos cap. IV præputium circumcissionis, qui Judaismi character est, antiquius esse statuit: sed in nos etiam injurius es, quorum genus & originem ab Judæorum stirpe derivas.

Ridicula Alphonfi ratiocinatio.

At etiam id objicere non est veritus, me contra Latinæ Bibliorum editionis fidem, & auctoritatem venisse: quod libro IX, cap. IX scripsit arcam die vel *Num. 14* XVII mensis septimi, ut Hebræis placet; vel XXVII, ut Græci; Latinique volunt, super montes resedisse. (Id enim nos de septimo, non secundo mensis voluisse scribere, tota per id caput instituta à nobis anni illius descriptio demonstrat.) Hic verò perspicue nobis impositum. Nam initio capitis illius, postquam anni, quo Diluvium accidit, accipitem rationem cum aliis de causis, tum ob Hebræorum, Latinorumque codicum varietatem, & *avnyaxias*, esse dixi; statum deinde quæstionis exponens, editionis utriusque rationem habui. Ita enim, opinor, faciendum fuit. Ceterum capitibus sequentibus, & in Chronico maxime, ubi citra quæstionem, & ambiguitatem opinionem exposui meam, Latinorum in partes transii.

Nunc quid Jurisconsultus de Hebræorum anno respondere audiamus. Non unum genus anni civile ipsos habuisse,











